

Fasnacht 2012



2012: „Tschau zämme!“

Es isch e grosses Thema in däm Joor,
dr Wältuntergang kunnt, es isch wohr.
Jede redet do drüber frey und munter,
denn Ändi 2012 goht unseri Ärde unter.

Dr Maya-Kaländer duet im Dezämber ände,
d'Wält sich denn sehr dramatisch wände.
Unseri Zyträchnig wird als Folg neu starte.
Was duet uns do ändi Joor numme erwarte?

Niemerts weiss es eigentlich wirklich genau,
us all dene Prophezeyige wird me nid schlaue.
Vulkän bräche us und Meteorite wärde ischlo,
Überfluetige und sogar d'liszyt wird wider ko.

D'Ärdachse duet sich dramatisch verschiebe,
d'Nahrig wird knapp, mir wärde uns bekriege.
D'Sunne duet alles vernichte und verbrenne.
S'wird so ko, mir mien das eifach anerkenne.

D'Apokalypse wird uns denn dr Räschte gä,
alles zerstöre und s'Läbe uf dere Ärde näh.
Irgendwie so wird's sy, das isch halt eifach so.
Alles isch am Änd, mir mien d'Ärde gli verlo.

Was alles wird passiere, wüsse au mir nid.
Villicht mache mir bi dr letsche Fasnacht mit?
Mir dien uns gege dr Untergang nid wehre,
und verabschiede uns vo Euch in aller Ehre.

An dr Fasnacht no eimol alles so richtig erläbe,
mit unserem Waage durch d'Stroosse fäge.
Mir dien uns nit gege s'kommendi Änd stämme,
drum sage mir Euch stolz: 2012: „Tschau zämme!“

Wenn dr Wältuntergang denn doch nit kunnt,
triibe mir's halt au im nägschte Joor wider bunt.

E schöni Fasnacht 2012!

www.escargots-fratze.ch